

Existoso College tocante Arqueologia di Aruba na Universidad di Leiden

Na comienzo di siman a tuma lugar na Facultad di Arqueologia di Universidad di Leiden dos dia di colleges cu e topico di 'Arqueologia di Aruba'. Arqueologonan drs. Harold Kelly y drs. Raymundo Dijkhoff, di Museo Arqueologico Aruba, a duna e colleges nan aki na studiantenan di e Universidad.



Studiantenan a haya un bista di e historia di investigacion arqueologico na Aruba cual ta data for di siglo 19. Hopi ta e investigadornan tanto di Reino como di otro partinan di mundo cu a ser atrae y fascina pa e riqueza arqueologico di nos isla. E relacion di investigacion arqueologico na Aruba y Universidad di Leiden ta institucionaliza for di añanan 1970.

Museo Arqueologico Aruba a hasi den transcurso di su 29 añanan di existencia proyectonan significativo cu Universidad di Leiden manera excavacionnan na Tanki Flip y Malmok. Arqueologonan Arubano di Museo Arqueologico ultimo añanan a guia e investigacion, maneho y conservacion di sitionanan arqueologico na Aruba. E aña aki bou nan iniciativa y esun di Dr. Corinne Hoffman, Museo a firma un protocol nobo di colaboracion cu Universidad di Leiden pa conhuntamente hasi proyectonan di investigacion y intercambia conocimiento.

Durante e colleges nan a presenta e Museo nobo na Schelpstraat y su facilidadnan pa studiantenan por hasi investigacion akinan pa nan thesis ya sea di Masters of Phd. E formula aki ta beneficioso tanto pa e estudiante, e Universidad y pa Aruba ya cu estudio y documentacion ta tuma lugar na un forma científicamente responsabel cu un costo comparti pa tur partido. Posibel proyectonan di investigacion ta inclui estudio y documentacion di material den colleccion di Museo y tambe participacion na trabou di excavacionnan di Museo Arqueologico. Studiantenan tawata hopi interesa y den lunanan venidero lo formaliza palabracionnan pa cuponan di pasantia di investigacion pa otro aña.

E bishita na Hulanda di arqueologonan Arubano ta posibel door di sosten di Ministerio di Cultura na Aruba y di Universidad di Leiden.

Museo Arqueologico Aruba
8 di september 2010

